

Clâsse 670 – Set piece for Adults Recitation without scripts

Ma P'tite Bouaîs'sie by FLM

Ch'est eune bouaîs'sie qué j'connais bein,
Tch'est l'sujet d'ma chanson,
Un p'tit côti à [La Trinneté](#),
Un paradis au pid d'siez mé.

Lé calme y règne, dans man côti,
Tout seu nou-s'y'est tréjous à s'n aise,
Ouaïthe qu' isolé n'y'a dgéthe d'ennion
Dans ma bouaîs'sie tout à banon.

Avaû un drédillet à gauche
Ou à drouaite, comme i' vouos pliaïtha,
Pâssez par-'chîn, né faites pon d'brit,
Pouor vaie la bieauté d'man côti.

En pliein été remplyi d'verduthe,
Et à la tchête un tapis d'fielles,
Dé toutes les sortes dé belles p'tites fleurs
Et l'chant d's ouaïthieux tous bein heûtheurs.

Bieaux grands hauts bouais tout à l'entou
Et un feillage dé toutes couleurs,
La musique du canné dans l'fond
Tchi russelle douochement tout du long.

Des peupliers, pus hauts qu' tous l's aut's,
Des tchênes en mâsse et des tchênelles,
Deux'trais châ'gniers, des ormes, et pis
Un bieu grand fau - rouai d'la bouaîs'sie.

Tchiques petits frênes, deux'trais êpîngnes,
Des ronches tout pliein et du dgèrue,
D'la mousse 'chîn et là sous les pids,
Feûgiéthe et geon à tête flieuthie.

Mais au r'nouvé quand y'a l'pus d'chouaix -
Les g'zettes, les bliuets, les pipots,
Quand l'bliu coucou est déhalé
Et les mèrgots - ch'est ch'la tch'est bé!

Et pis pus tard du rouoge coucou
(Chein qu' nou-s-appelle des vièrs garçons),
Du potithon, pis du chuchet
Tout teurt sus l'mort-bouais endgèrrué.

Des p'tites feûgu'tholes et du frêgon,
Du païvre à j'vaux - y'en a tréjous,
Quand veint lé s'tembre la vèrge d'or,
Jalousie, menthe - tchi bel êffort!

Y'a du cresson et d'la sûtthe-ieaux,
D'la chue, du han et du gliajeu,
D'lôsyi, du saulx et du jontchet
À la braichie avaû l'canné.

Dans ma bouaïs'sie j'sis bein èrchu,
Ch'est si pliaïthant d'ouï la musique -
Tout l'ouaïthelîn chante à forte vouaix
A londgeu d'jours parmi les bouais.

Lé cri d'la pie m'est familyi,
La teurtérelle, tchiquefais l'coucou,
Les geais étout à bieu plieunmage,
Et d'autres ouaïthieux tchi sont en viage.

J'connais l'bouvtheu et la rouoge-gorge,
Et touos les mêles m'sûffl'yent beinv'nue,
La grive, lé vèdreu et l'mouosson.
Et l'rossîngno (tch'est un pînchon),

Tchiques bieux jaûnouais et des souciques,
Et pis l'tui-tui dans l'mais d'avri,
L'êtournieau, l'craquelfîn et l'gliaineux,
Des d'mouaïselles et des p'tits mèssieux.

l' y'a étout lé rouoge linnot,
Lé pique-en-bouais et l'vèrmîngnon,
Lé p'tit raîté - eune vraie dgilouette -
Et la mîngnonne dé cardrinnette.

N'oublions pon les papillotes,
Atout lus ailes si couleuthées -
N'y'éthait d'bieauté dans man cōti
Sans papillotes à voltilyi.

Par haut, par bas, n'împorte iou
(Y'a bein des c'mîns dans ma bouaïs'sie),
En toutes saisons, d'amont, d'ava,
La paix, l'èrpos sont tréjous là.

La bieauté qué j'aimons touos nous.
Trajet d'chutte vie bénin et doux.
Mèrveil'yes dé la Natuthe et pis -
Mais, v'n-ouos-en tous vaie ma bouaïs'sie!